

# Co finanziar il rumantsch grischun en scola?

(anr/vi) Il project «rumantsch grischun en scola» na possia betg vegnir realisà ils proxims tschintg onns. I manchia las finanzas, ha *Jon Domenic Parolini* (pps/Suot Tasna) constatà ier en il cussegl grond.

La regenza grischuna haja dumandà il favrer la confederaziun per sustegn finanziar – tranter auter per pudair pagar il project «rumantsch grischun en scola».

En il fratemp saja arrivada la risposta da Berna: Il cusseglier federal *Pascal Couchepin* scrivia ch'el na vesia naginas pussaivladads da procurar per dapli daners en il plan da finanzas da la confederaziun dal 2007–2009. Jon Domenic Parolini ha cità ina curta passascha da questa brev e concludì: Ils daners per introducir il rumantsch grischun en scola na sajan betg avant maun. El ha cusseglia a la regenza da tschentar autras prioritads e d'introducir il rumantsch grischun be a moda passiva en scola – tenor il concept Haltiner. Quai saja pli effizient e pli bunmartgà.